



Bosna i Hercegovina, Federacija Bosne i Hercegovine, Srednjobosanski kanton/
Kanton Središnja Bosna, 72270 Travnik

PRAVILNIK O NAUČNOISTRAŽIVAČKOJ DJELATNOSTI UNIVERZITETA U TRAVNIKU

(Prečišćeni tekst)

Travnik, avgust 2018. godine

Na osnovu člana 64. Zakona o visokom obrazovanju (Službene novine SBK/KSB 4/13) i člana 58. Statuta Univerziteta u Travniku, Senat Univerziteta u Travniku na svojoj sjednici održanoj dana 30.8.2018. godine donio je

PRAVILNIK O NAUČNOISTRAŽIVAČKOJ DJELATNOSTI UNIVERZITETA U TRAVNIKU (Prečišćeni tekst)

I OPĆE ODREDBE

Član 1. (Predmet Pravilnika)

Pravilnikom o naučnoistraživačkoj djelatnosti (u daljem tekstu: Pravilnik) uređuje se: naučnoistraživačka djelatnost, nosilac naučnoistraživačke djelatnosti, naučna i istraživačka zvanja, uslovi i postupak za izbor u naučna – nastavna zvanja na Univerzitetu u Travniku (u daljem tekstu: Univerzitet).

Član 2. (Pojam naučnoistraživačke djelatnosti)

Naučnoistraživačka djelatnost u smislu ovog pravilnika obuhvata naučnoistraživački rad, objavljivanje rezultata naučnoistraživačkog rada, osposobljavanje kadrova za naučnoistraživački rad i usavršavanje naučnika i istraživača.

Naučnoistraživački rad obuhvata fundamentalna, primijenjena i razvojna istraživanja u skladu sa Zakonom o naučnoistraživačkoj djelatnosti.

Rezultati naučnoistraživačkog rada vrednuju se objavljivanjem u naučnim publikacijama ili provjerom u praksi, a trebaju da sadrže elemente izvornosti i novosti.

Osposobljavanje kadrova za naučnoistraživački rad podrazumijeva stvaranje uslova za sticanje naučnog stepena magistra i doktora nauka.

Usavršavanje naučnika i istraživača podrazumijeva sticanje novih i produbljivanje stečenih zvanja putem različitih oblika usavršavanja.

Naučnoistraživački rad se zasniva na: slobodi i autonomiji stvaralaštva, konkurentnosti naučnih programa i projekata, primjeni međunarodnih standarda i međunarodnih mjerila kvaliteta u oblasti nauke, javosti rada i rezultata toga rada koji su podložni naučnoj i stručnoj kritici,

etičnosti naučnika i istraživača, saradnji sa domaćim i međunarodnim institucijama u oblasti nauke i istraživanja, povezanosti sa sistemom visokog obrazovanja i poticanju i uvažavanju specifičnosti nacionalnih sadržaja.

Član 3. (Nadležnost)

Naučnoistraživačku djelatnost obavlja Univerzitet putem organizacionih jedinica (fakulteta, naučnih instituta, centara) i podorganizacionih jedinica (naučnih instituta organizacionih jedinica i centara).

Član 4. (Učesnici)

Naučnoistraživačko osoblje su osobe koje učestvuju u realizaciji naučno-nastavnog, naučnoistraživačkog i istraživačkorazvojnog rada na Univerzitetu.

Član 5. (Naučnik i istraživač)

Naučnik je lice izabrano u naučno zvanje, pod uslovima i po postupku utvrđenom Zakonom koji reguliše naučnoistraživačku djelatnost, kao i lice izabrano u zvanje docenta, vanrednog profesora i redovnog profesora, pod uslovima i po postupku utvrđenom Zakonom o visokom obrazovanju.

Istraživač je lice izabrano u istraživačko zvanje, pod uslovima i na način utvrđen Zakonom koji reguliše naučnoistraživačku djelatnost, kao i lice izabrano u zvanje višeg asistenta i asistenta pod uslovima i po postupku utvrđenom Zakonom o visokom obrazovanju.

II NAUČNA I ISTRAŽIVAČKA ZVANJA

Član 6. (Naučna zvanja)

Naučna zvanja u smislu Zakona, Statuta Univerziteta i ovog pravilnika su: naučni saradnik, viši naučni saradnik i naučni savjetnik.

Član 7. (Istraživačka zvanja)

Istraživačka zvanja su u smislu Zakona, Statuta Univerziteta i ovog Pravilnika: stručni saradnik, viši stručni saradnik, stručni savjetnik.

Član 8.
(Postupak i uslovi za izbor)

Postupak i uslovi za izbor u naučna i istraživačka zvanja vrši se u skladu sa Zakonom o naučnoistraživačkoj djelatnosti Srednjobosanskog kantona.

III NAUČNO-NASTAVNA ZVANJA

Član 9.
(Naučno-nastavna zvanja)

Univerzitet dodjeljuje naučno-nastavna zvanja i to:

- Redovni professor,
- Vanredni professor,
- Docent,
- Lektor,
- Viši asistent
- Asistent.

Član 10.
(Uslovi izbora u naučno-nastavna zvanja)

Munimalni uslovi za izbor u naučno-nastavna zvanja su:

- a) asistent: odgovarajući univerzitetski stepen, s najmanje 240 ECTS bodova i najnižom prosječnom ocjenom 3,5 ili 8,
- b) viši asistent: stepen drugog ciklusa (magisterij),
- c) lektor: stepen drugoga ciklusa (magisterij),
- d) docent: naučni stepen doktora nauka u danom području, najmanje tri naučna rada objavljena u priznatim publikacijama te pokazane nastavničke sposobnosti,
- e) vanredni professor: provedeno najmanje jedno izbornu razdoblje u zvanju docent, te pet naučnih radova objavljenih u priznatim publikacijama, objavljena knjiga i originalni stručni uspjeh, kao što je projekat, patent ili originalna metoda, sve nakon izbora u zvanje docent, te mentorstvo kandidata za stepen drugog ciklusa,
- f) redovni professor: provedeno najmanje jedno izbornu razdoblje u zvanju vanredni professor, najmanje dvije objavljene knjige, najmanje osam naučnih radova objavljenih u priznatim publikacijama, sve nakon sticanja zvanja vanredni professor, te uspješno mentorstvo kandidata za stepen drugog i trećeg ciklusa.

Član 11.
(Postupak za izbor u naučno-nastavna zvanja)

Zbog isteka perioda na koji su nastavnici i saradnici izabrani ili zbog potrebe naučnoistraživačke institucije Univerziteta za većim brojem nastavnika i saradnika u naučnoistraživačkom procesu,

pokreće se postupak za izbor nastavnika i saradnika u isto ili više zvanje, odnosno za izbor novih nastavnika i saradnika na Univerzitetu u skladu sa Zakonom i Statutom Univerziteta.

Uslovi za izbor u naučno-nastavna zvanja lektora, docenta, vanrednog profesora i redovnog profesora definisani u prethodnom članu, a koji se tiču publikovanja knjiga i naučnih radova bliže će se regulisati posebnim Uputstvom.

Prilikom izbora u isto ili više naučno-nastavno zvanje uzimaju se u obzir samo objavljeni radovi, knjige i rezultati vlastitih istraživanja u primjeni, projekti te mentorstva, odnosno ostvareni rezultati u radu nakon izvršenog posljednjeg izbora u zvanje, koji se obavezno prilažu prilikom svakog izbora u zvanje. Vođenje projekata i mentorstva dokazuju se odlukom nadležnog organa.

Član 12. **(Zaključivanje ugovora o radu)**

Član akademskog osoblja zaključuje ugovor o radu sa visokoškolskom ustanovom na period za koji je izabran. Izuzetno izbor se može izvršiti i bez zaključivanja u ugovora radu, o čemu odlučuje NNV visokoškolske ustanove.

Član akademskog osoblja (strani državljanin) zaključuje ugovor o radu isključivo na određeno vrijeme, odnosno na period na koji glasi radna dozvola. Produženje radne dozvole dispozitivna je odluka poslodavca.

Nakon isteka tog perioda visokoškolska ustanova obavezna je zaključiti novi ugovor o radu sa svakim članom akademskog osoblja koji je izabran u isto ili više zvanje, osim u slučaju stranih državljana. Redovni profesor (državljanin BiH) zaključuje ugovor o radu na neodređeno vrijeme. Rokovi za izbor u isto ili više zvanje akademskog osoblja produžiti će se za vrijeme provedeno na porodiljskom odsustvu, bolovanju dužem od šest mjeseci, javnoj dužnosti ili iz drugih opravdanih razloga o kojima odlučuje NNV. Članu akademskog osoblja koji nakon isteka izbornog perioda ne bude izabran u isto ili više zvanje, Univerzitet može ponuditi zaključivanje novog ugovora o radu na poslovima za koje se ne traži izbor u akademsko zvanje ako za to postoji potreba.

IV NAUČNOISTRAŽIVAČKI PROJEKTI

Član 13. **(Učešće u projektima)**

Učestvovanje Univerziteta u projektu odobrava rektor Univerziteta na osnovu pismenog zahtijeva potencijalnog izvođača projekta. Kod učešća u komercijalnim projektima i projektima koje finansira EU iznos koji pripada Univerzitetu reguliše se tim projektima. Nadzor nad realizacijom navedenih ugovora u kojima učestvuju zaposleni na Univerzitetu vrši prorektor za naučnoistraživački rad Univerziteta.

VI URED ZA NAUČNOISTRAŽIVAČKI RAD

Član 14. (Ured za naučnoistraživački rad)

Za unapređenje naučnoistraživačke djelatnosti brine se Ured za naučnoistraživački rad (u daljem tekstu: Ured).

Član 15. (Nadležnosti Ureda)

Nadležnosti Ureda su:

- a) priprema i predlaže strategiju naučnoistraživačkog rada, istraživački profil i akcioni plan istraživačke karijere Univerziteta,
- b) prati izbore u naučnonastavna i istraživačka zvanja,
- c) daje mišljenje o zakonima i drugim propisima iz oblasti naučnoistraživačkog rada, a koji obezbjeđuju opšte uslove za podsticanje naučnoistraživačke djelatnosti i korištenje njenih rezultata
- d) daje mišljenje i predlaže postupak utvrđivanja obima sredstava za naučnoistraživački rad,
- e) prati osvarivanje strategije naučnoistraživačkog rada,
- f) prati kvalitet naučnoistraživačkog rada i daje prijedloge i sugestije,
- g) sarađuje sa NNV fakulteta po pitanjima naučnoistraživačkog rada,
- h) predlaže i koordinira rad na naučnoj publicistici,
- i) pruža informacije o aktuelnosti i statusu međunarodnih indeksnih baza,
- j) prati realizaciju projekata,
- k) istražuje i informira sastavnice o mogućnosti za apliciranje na projekte,
- l) prati i analizira razvoj istraživačke karijere,
- m) donosi Poslovnik o radu Ureda,
- n) prikuplja i obrađuje informacije o svim oblicima naučnoistraživačke djelatnosti za koje je nadležan i o tome podnosi najmanje jednom godišnje izvještaj odboru za kvalitet Univerziteta,
- o) obavlja i druge poslove u skladu sa zakonom, Statutom i drugim općim aktima Univerziteta.

Član 16. (Sastav Ureda)

Ured ima najmanje pet članova koje sačinjavaju predstavnici fakulteta i prorektor za naučnoistraživačku djelatnost. Voditelj Ureda je prorektor za naučnoistraživačku djelatnost. Ured ima sekretara koji se bira iz reda saradničkog osoblja.

Član 17. (Javnost rada Ureda)

Rad Ureda je javan. Ured je dužan da svoje zaključke, preporuke i mišljenja učini dostupnim svim članicama Univerziteta, nastavnom osoblju i studentima.

Član 18.
(Sredstva za rad Ureda)

Sredstava za rad Ureda obezbjeđuju se iz zajedničkih sredstava Univerziteta.

VII PRELAZNE I ZAVRŠNE ZAVRŠNE ODREDBE

Član 19.
(Izmjene i dopune Pravilnika)

Izmjene i dopune ovog Pravilnika vrše se na način i po postupku utvrđenom za njegovo donošenje.

Član 20.
(Tumačenje Pravilnika)

Za tumačenje odredaba ovog Pravilnika nadležana su tijela Univerziteta.

Obavještenja i upute sa primjenom odredaba iz stava (1) ovog člana daje rektor Univerziteta i prorektor za naučnoistraživačku djelatnost.

Član 21.
(Stupanje na snagu)

Ovaj Pravilnik stupa na snagu osmog dana od donošenja, a primjenjuje se od početka akademske 2018./2019. godine.

Član 22.
(Sadržaj prečišćenog teksta)

Prečišćeni tekst Pravilnika o naučnoistraživačkoj djelatnosti Univerziteta u Travniku obuhvata Odluku o izmjenama i dopunama Pravilnika o naučnoistraživačkoj djelatnosti Univerziteta u Travniku broj 552/18-1 od 26.7.2018. godine.

Broj: 587/18

Datum: 30.8.2018. godine

Rektor

prof. dr. Rasim Dacić